



La «scooter gang» da Sent s'allegra cha lur piazza da skate es gnüda salvada.

FOTO RETO RAUCH

## Üna nouva rampa per la «scooter gang» da Sent

Daspö plüs ons d'eira üna rampa da skate pro l'areal da Palüzot a Sent. In avrigl es quella gnüda demontada e transferida a Scuol. Üna gruppa d'uffants ha perquai surtut l'iniziativa ed organisà cun agüd da genituors e dal cumün üna nouva rampa.

ANDRI NETZER/FMR

Els s'inscuntran mincha marcurdi davomezdi, lur revier es la piazza da skate a Palüzot – la «scooter gang» da Sent. Quai es üna gruppa da 20 fin 25 uffants ill'età da scouline fin a la quarta classa primara. Pro la piazza da skate a Palüzot van els cun lur scooters e trenan da tuotta sorts trics sün üna rampa chi'd es fatta our da metal ed our da lain. Quella rampa tocca però a la Element ScRL da Scuol e d'eira gnüda installada be provisoricamaing sù Sent. Il cumün da Scuol ha perquai comunicà in avrigl cha quella gnia demontada ed integrada illa piazza da skate a Scuol, chi's rechatta davo la halla da glatsch a Gurlaina. Da perder lur rampa d'eira pels uffants üna novità trista. Els nun han però laschè pender las alas. Cun agüd da genituors e dal cumün da Scuol han els organisà üna nouva rampa.

### Surtut l'iniziativa

«Quel di cha la rampa es gnüda demontada d'eiran ils uffants oura Palüzot. Els d'eiran frustrats e nu pudaivan incleger perche cha'l cumün tils piglia davent lur rampa. Els han lura tscherchè ideas che chi's pudess far cunter»,

disch *Christine Benes*, la mamma dad ün dals uffants da la «scooter gang» da Sent. Ch'els han lura decis da vulair ramassar raps our d'aigina iniziativa per cumprar novs elemaints. Cun placats fats svessa sun els its da porta a porta tras Sent ed han perfin pledantà glied sün via per rablar insembel avuonda raps per realisar lur intent. «Infra duos uras vaivan els ramassà 450 francs. Quai d'eira natüralmaing massa pac per cumprar uschè üna rampa da skate. Perquai han ün pèr genituors decis da tils güdar», uschè *Christine Benes* inavant.

### Sustegn dad oters genituors

Ün da quels genituors d'eira eir *Reto Rauch* da Sent. El disch: «Nus laivan cha noss uffants possan eir in avegnir passantar lur temp liber oura Palüzot. Eu n'ha lura contactà il cumün per sclerir, sch'el ans pudessan güdar da finanziaziar uschè üna rampa.» Eir otras mammas e baps han sport man. *Reto Rauch*: «Ün oter genituor s'ha infuormà pro differentas firmas chi fabrican da quels elemaints da skate. Uschè vaina provà da chattar elemaints per ün predsch favuraivel.» Üna da quellas firmas d'eira pronta da tils güdar. Ils iniziants han surgnì la pus-

sibilità da cumprar per var 30 000 francs ün set da rampas cumplet cun ot elemaints. «Davo es quai lura stat üna cuorta roba. Infra pacas eivnas d'eiran ils novs obstaculs sülla piazza a Palüzot», disch *Reto Rauch*.

### Sustegn eir dal cumün

Eir il cumün da Scuol d'eira pront da güdar als uffants ed a lur genituors. «Els d'eiran cuntaints cha nus vain tscherchè il discuors e nu vain simplamaing be reclomà», disch *Christine Benes*. Insembel culla organisaziun turistica, *Sent Turissem*, ha il cumün da Scuol finanzia il novs elemaints. Il capo da Scuol, *Christian Fanzun*, disch: «Tenor la costituziun cumünala vaina a disposiziun ün mez milliun francs per progets chi nu sun büdschetats e chi vegnan inoltrats d'urant l'on. Nus vain perquai dat ün import da 30 000 francs.» Our da motivs da mantegniment e da sgüranza sun quellas rampas in possess dal cumün politic. Per tillas installar, ha eir stuvü gnir fatta üna dumonda da fabrica.

Quels detagls nun intressan però a la «scooter gang» Sent. Els sun simplamaing cuntaints d'avair üna nouva rampa e da's pudair eir in avegnir inscuntrar a Palüzot per trenar lur trics.

## Grazcha a la buna collavuraziun

In sonda passada ha gnü lö la radunanza generala da la Cooperativa Butia Tarasp. Grazcha a la stretta collavuraziun da butia, posta ed infuormaziun turistica han ils responsabels pudü preschantar ün resultat positiv.

BENEDICT STECHER/FMR

Davo cha la butia da Tarasp d'eira in privel da stuvair succomber e serrar sias portas, es gnüda fundada als 18 da november 2005 la Cooperativa Butia Tarasp. Plü tard es gnüda integrada la posta ed eir l'infuormaziun turistica illa butia. Cun quellas trais pozzas sta la butia actualmaing sün ün bun fundamaint. In sonda passada ha ella pudü preschantar a la radunanza generala ün quint positiv. Intant ch'amo dal 2016 muossaiva il quint annual ün deficit da s-chars 34 000 francs, han ils responsabels pudü preschantar uossa ün guadogn da s-chars 11 000 francs. La devisa da redüer il s-chart, da serrar il mardi la butia e da lavurar be cun üna vendadra al di, ha gnü ün bun esit ed ha manà al resultat allegraivel. Il quint 2020 es gnü approvà da la radunanza e quella ha dat dischcharg als organs respun-

sabels. La radunanza generala ha tut cumgià dad *Irene Hochstrasser* chi ha impondü blera lavur illa butia da cumün. La suprastanza es gnüda confermada in globo e *Béatrice Miller* es gnüda tschernüda nov illa suprastanza. Sco presidenta da la suprastanza han ils preschaints elet a *Cornelia Koch*.

### Cafè-butia

Daspö ün pèr ons sun ils responsabels da la butia landervia a provar da realisar ün proget café-butia. Davo chi s'ha elavurà la planisaziun sun ils preschaints gnüts infuormats davart la finanziaziun. Sco cha'l suprastant *Romedius Alber* ha dit es quella greiv realisabla. L'object culla butia es in possess dal cumün e la banca nun es pronta da metter a disposiziun daplü co s-chars 30% dals cuosts previs da var 1,1 milliuns francs. Ils responsabels prouvan uossa da gnir pro culla munda mancanta per realisar il proget.



La butia cun posta ed infuormaziun as rechatta i'l center dal cumün.

FOTOBENEDICT STECHER

## SCUOL

### 421 suottascripziuns per daplü trasparenza

La radunanza cumünala da Scuol ha approvà il rendaint 2020 chi serra cun ün guadogn da 6,86 milliuns francs. Da discuorrer ha dat l'iniziativa per introduer il princip da trasparenza.

FLURIN ANDRY/FMR

La sesantina da preschaints a la radunanza da rendaint a Scuol in sala cumünala ha pudü tour part in lündeschi saira ad ün novum: Pella prüma jada s'haja gnü da trattar trais protestas cunter il protocol da la radunanza dals 8 da marz. I's trattaiva da votantas e votants chi nu d'eiran d'accord co cha lur votums d'eiran gnüts protocollats. «Il protocol vain fat subit davo la radunanza e cuntegna las decisiuns e quai chi'd es gnü dit», ha declerà il capo *Christian Fanzun*, «pro protestas cunter il protocol decida la suprastanza cumünala co corregger e suottametta quai lura a la prosma radunanza.» La majorità ha acceptà las correcturas dal protocol sco proponü da la suprastanza. Unanimamaing ha ella approvà eir il rendaint 2020 chi serra cun ün guadogn da 6,86 milliuns francs.

### «No manian il medem»

La suprastanza cumünala ha infuormà davart las propostas per amegldrar la trasparenza pro'l cumün. Il Grischun ha introdüt quella ledscha chantunala in avrigl 2016. A Scuol han lantschè *Dumeng Bischoff*, *Duri Bezzola*, *Romedi Castellani*, *Duri Denoth* ed *Albert Mayer* ün'iniziativa cumünala per l'introducziun dal princip da trasparenza sün nivel cumünal. Al medem mumaint s'ha occupada eir la suprastanza da quella tematica ed elavurà üna proposta cun ün sböz da ledscha. «Ils iniziants lessan cha no surpiglian il model chantunale e la suprastanza propuona il model d'ün oter cumün», ha declerà *Christian Fanzun*. El ha dit cha las differenzas sajan minimas, cha suprastanza ed iniziants hajan il medem böt. In nom dals iniziants ha surdat *Dumeng Bischoff* l'iniziativa suottascribta da 421 votantas e votants. Necessari füs-sann statta 150 suottascripziuns. «No examinain uossa l'iniziativa e decidain lura, acceptar o suottametter a la radunanza cumünala, chi sarà probabelmaing in settember, üna cuntraproposta», ha dit il capo.

### Senda da Clemgia bainbod darcheu transibla

La radunanza cumünala da Scuol ha acceptà la moziun da *Duri Denoth*: «Cur cha la radunanza cumünala ha da decider davart credits chi surpassan 200 000 francs, schi trametta il cumün – insembel cun l'invid – infuormaziuns plü detagliadas davart ils progets correspondent.» *Arno Kirchen*, il manader da l'uffizi tecnic, ha infuormà cha las lavuors vi da la Punt da Gurlaina cuntinueschan. «Quai vala eir pella senda illa chavorgia da la Clemgia chi'd es serrada daspö l'on 2017, scha tuot va bain tilla pudaiva drivir darcheu d'utoun.»



La radunanza cumünala da Scuol ha approvà unanimamaing il rendaint 2020.

FOTO FLURIN ANDRY

## ZERNEZ

### Impedimaints pervi da cuorsa da velos

In dumengia, ils 4 da lügl, ha lö il Maraton Engiadinais da velos cun partenza e böt a Zernez. Pervi da quista occurrenza sportiva poja dar impedimaints e temps da spettar pel trafic. Cun disturbis esa da far quint tanter las 6.30 fin las 17.00. Pertoes sun ils seguaints tragets: Zernez – Susch – Flüela – Tavo – Schmiten – Alvagni – Bravuogn – Alvra Ospiz – La Punt – Sviamaint Madula – Zernez. Tanter las 7.00 e las 9.00 poja dar temps da spettar plü lungs tanter Susch e Tavo. La Polizia chantunala giavüsch da respettar ils avis dals responsabels dal trafic. (cdm/fmr)